

Karl Ettlinger (1882-1939)

Mei greeßter Landsmann

Zor Enthüllung vom junge Goedhee seim Straßburger Denkmal

Es dhut ääm freie ganz nadierlich,
Des Herz werd ääm mit Schdolz gefüllt,
Wann vom 'me Landsmann werd gebiehrlich
E Denkmal erjendwo enthüllt.

5

Unn dobbelt viel haww ich empfunne,
Unn war Euch dobbelt schdolz dadruff.
Daß se im scheene Schdraßborg drunne
De *junge* Goedhee schdelle uff.

10

De junge Goedhee! – Dausend Bilder
Wern da lewennig vor meim Blick.
Es fehlt net viel, daß ich se schilder,
Doch is mei Raum beschränkt, zem Glick!

15

E ganzes kläänes Äägeblickche
Derf ich verweile bei em bloß.
Ich guck en mit seim Fridderickche
Vor meine Ääge riesegroß.

20

Es hat sich halt an dene beide
Erfüllt, was heut ääch noch modern:
E freier Dichter kann kään Bfaff net leide,
Doch ihre Döchter kißt er gern.

25

Ja, Goedhee, *Du* triebst doller Posse,
Du göttliches Gewitteroos,
Du hast Dei Jugendzeit genosse
Unn gingst derr grad wie Blicher los.

30

Unn warstde ääch net gut ze schbreche
Uff Frankfort, uff Dei Vatterschdadt,
So zeigt des ewe, daß sei Schwäche
E jedder Mensch uff Erde hat.

35

Deswege bist de doch gegrawe
Dief in mei Herz, ich lieb Dich sehr.
Dann e Schenie von Deine Gawwe
Des kimmt in hunnert Jahr net mehr.

40

Drum: dhu ich äänst nach Schdraßborg fahre,
– Des kann sogar sehr bald bassiern –
Dann dhu ich merr de Gang net schbare
Unn dhu Dei Denkmal vissediern.

Unn knie mich hie, *Dir* grad ze Fieße,
Zieh ab mein Hut mit kiehnem Schwung,
So dhut der »*alde* Frankforder« begrieße
De *junge* Frankforder, der ewig jung!
(256 words)

Quelle: <https://www.projekt-gutenberg.org/ettlink/frankfor/chap034a.html>